

Tiaind qu'an veut faîre de l' échprit, èl airrive qu' en dieuche ïn pô des mentes. I n' seus pe aivu bïn hannête en vos djâsaint des aillumous de raimboiyous. I hésâidge (*risque*) de bëyeie ènne fâsse aivisaiye de nôt' piaînnatte en ces que n' lai coégnéchant pe. Les hannes otupant bïn pô d' piaice tchu lai tiere. Che les dous miyards de dmoéraints que peupyant lai tiere se tenyïnt vyèdreit (*debout*) èt ïn pô sèrrès, cment po ïn mitïng, ès leudg'rïnt aîjiement tchu ènne piaice publique de vint miyes de long tchu vint miyes de laîrdge. An poérrait entéchie l'hann'lâtè (*humanité*) tchu l' mâbri (*moindre*) ptét îyot di Paichifitche.

Les grantes dgens, bïn chur, ne vos v'lant p' craire. Èlles se botant en tête de tni brâment de piaice. Èlles se voyant ïmpoëtchainnes cment les baiobas. Vos yos consèyrèz dâli d' faire lo compte. Èlles aidôrant les tchiffres : çoli yos piairé. Mains ne pietes (*perdez*) pe vôt' temps en ci traivaiye. C' ât inutiye. Vos èz confiance en moi.

Lo ptét prïnce, ïn cô tchu tiere, feut dâli bïn churpri de ne niun voûr. Èl aivait dj' pavou de s' être trompaie de piaînnatte, tiaind qu' ïn ainnâ (*anneau*) tieûlée (*couleur*) de yune eurmûé dains l' châbye.

- Boinne neût, fsé lo ptét prïnce è tot hésâid.
- Boinne neût fsé l' sèrpent.
- Tchu quée piaînnatte qu' i seus tchoué ? dmaindé lo ptét prïnce.
- Tchu lai Tiere, en Aifritche, réponjé l' sèrpent.
- Ah !... Dâli, è n' y' é niun tchu lai Tiere ?
- Ci ç' ât l' déjèrt. È n' y' é niun dains les déjèrts. Lai Tiere ât grante, dié l' sèrpent.

Lo ptét prïnce se sieté tchu ènne piere èt y've les eûyes vâs l' cie :

- I me dmainde, qu' è dié, che les yeûtchïns sont échériss po que tiétiun poéyeuche ïn djoué rtravaie l' sïn. Raivoéte mai piaînnatte. Èlle ât djeûte en d'tchu d' nos... Mains cment qu' èlle ât laivi !
- Èlle ât bëlle, dié l' sèrpent. Qu' ât-ce que t' vïns faire ci ?
- I âi des diffitiultès aivô ènne çhoué, dié lo ptét prïnce.
- Ah ! fsé l' sèrpent.

Et ès s' coidjainnent.

- Voû ât-ce que sont les hannes ? rprenié enfin lo ptét prïnce. An ât ïn pô seingne dains l' déjèrt...
- An ât âchi seingne tchéz les hannes, dié l' sèrpent.

Lo ptét prïnce lo raivoété bïn grant (*longtemps*).

- T' és ènne soûtche de bëte, qu' è yi dié enfin, mïnce cment ïn doigt.
- Mains i seus pus puichaint qu' lo doigt d' ïn roi, dié l' sèrpent.

Lo ptét prïnce é t'aivu ïn sôri :

- Te n' és p' bïn puichaint... te n' és piepe de paittes... te n' peus piepe voiyaidgie...
- I t' peus empoëtchaie pus laivi qu' ènne grôsse nèe (*navire*), dié l' sèrpent.

È s' enrôlé alentoué d' lai tchvéye di ptét prïnce, cment ïn braich'lat d' oû :

- Çtu qu' i toutche, i lo rbèye en lai tiere dâs laivoù èl ât soûtchi, qu' è dié encoé. Mains t' és çhaî (*pur*) èt te vïns d' ïn yeûtchin...

Lo ptét prïnce ne réponjé ran.

- T' me faîs pidie, toi chi çhaile, tchu çte Tiere de frej'lat (*granit*). I t' peus édie ïn djoué ch' te te rpens (*regrette*) trop de tai piaînnatte. I peus...
- Ôh ! I âi tot bïn compri, fsé lo ptét prïnce, mains pourquoi qu' te djâses aidé poi dvijattes ?
- I les résouûs totes, dié l' sèrpent.

Et ès s' coidjainnent.